

四庫全書

集部

欽定四庫全書

集部

東萊詩集卷一
六至

詳校官贊善_臣朱紱

主事_臣呂雲棟覆勘

總校官進士_臣繆琪

校對官典簿_臣劉景岳

謄錄舉人_臣東賓

欽定四庫全書

集部四

東萊詩集

別集類三 宋

提要

臣等謹案東萊詩集二十卷宋呂本中撰本
中字居仁尚書右丞好問長子紹興中嘗以
排和議忤秦檜見擯于朝官至中書舍人故
宋人稱為呂紫薇又稱東萊先生祖謙即其
孫也事蹟詳具宋史本傳本中詩法出于黃

庭堅嘗作江西宗派圖推庭堅為始師胡仔謂其詩清駛可愛教陶孫謂如散聖安禪自能竒逸皆極推重朱子亦稱本中論詩欲字字響而暮年詩多啞然尊江西派者終推本中為赤幟此集有慶元二年陸游序乾道二年曾幾後序文獻通考載有集外詩二卷今此本無之又陸游序稱嗣孫祖平悉裒集他文為若干卷今此本有詩無文獨其草趙鼎

遷右僕射制詞所云合晉楚之成不若尊王
而賤伯散牛李之黨未如明是而去非之語
以秦檜惡之載於日歷尚為世所傳誦其他
文多泯沒不傳矣乾隆四十三年十月恭校
上

總纂官

臣紀昀

臣陸錫熊

臣孫士毅

校

總校官

臣陸

費

墀

墀

東萊詩集原序

天下大川莫如河江其源皆來自蠻夷荒忽遼絕之域
累數萬里而後至中國以注於海今禹之遺書所謂岷
積石者特記禹治水之迹耳非其源果止於是也故爾
雅謂河出崑崙虛而傳記又謂河上通天漢游至蜀窮
江源則自蜀岷山以西皆岷山也地斷壤絕不復可窮
河江之源豈易知哉古之學者蓋亦若是惟其上探處
義唐虞以來有源有委不以遠絕不以難止故能卓然

布之天下後世而無媿凡古之言者皆莫不然自漢以下雖不能如三代盛時亦庶幾焉宋興諸儒相望有出漢唐之上者迨建炎紹興間承喪亂之餘學術文辭猶不愧前輩如故紫薇舍人東萊呂公者又其傑出者也公自少時既承家學心體而身履之幾三十年仕愈躋學愈進因其暇盡交天下名士其講習探討磨礱浸灌不極其源不止故其詩文汪洋閎肆兼備衆體間出新意愈奇而愈渾厚震耀耳目而不失高古一時學士

宗馬晚節稍用於時在西掖嘗兼直內廷草趙丞相鼎
制力排和戎之議忤秦丞相檜丞相自草日歷載公制
辭以為罪而天下益推公之正公平生所為詩既已孤
行於世嗣孫祖平又盡裒他文凡若干首為若干卷而
屬游為序游自童子時讀公詩文願學焉稍長未能遠
遊而公捐館舍晚見曾文清公文清謂某君之詩淵源
殆自呂紫薇恨不一識面游於是尤以為恨則今得託
名公集之首豈非幸歟慶元二年九月既望中大夫提

舉建寧府武夷山冲佑觀山陰陸游謹序

欽定四庫全書

東萊詩集卷一

宋 呂本中 撰

暮步至江上

客事久輸鸚鵡盃
春愁如接鳳凰臺
樹陰不礙帆影過
雨氣却隨潮信來
山似故人堪對飲
花如遺恨不重開
雪籬風榭年年事
辜負風光取次回

題張君墨竹

崇寧五年宿州

張卿畫竹今成癖
笑語揮毫不作難
歛見高標起蕭瑟

坐令炎暑變荒寒筆頭似有千年韻胸次猶須萬斛寬
歲晚雪霜君記取此君懷抱要重看

陰

涼風森爽遽如許天氣蕭條殊未佳密迺留陰

原缺二字

竹

敗畦藏雨鬪蛙蟄碧雲暮合人千里丹鳳

原缺二字

天一涯

唯有雙叢庭下菊殷勤還作去年花

符離諸賢詩

窮居日荒涼杜門與世絕親故日夜疎詩書固宜缺符

離雖陋邦賢士稍羅列德操青雲器議論輩前哲外貌
發英華中心瑩冰雪介然特立士勁氣剛于鐵攘臂辯
是非孰能逃區別信民粹而和名利誠難悅汨沒稠人
中獨抱雲松節偉哉二三子實乃邦家傑我來從之游
內顧慙疎拙欣然對三益放懷歌數闕已矣不須言渠
當為君說

德操充之皆約九月間見過今皆未至扶杖出門
悠然有感

病着文書懶出門，偶扶藜杖看行雲。
屋頭日在轉花影，水面風來散縠紋。
不厭莫城千嶂合，稍令明月萬家分。
小庭留得清秋在，已見霜紅未見君。

遊劉氏園

大觀元年宿州

暖日溫風破淺寒，短青無數簇幽蘭。
三年止酒償春意，可忍花梢帶雨看。

上元

步屨荒園日已昏，呼兒當埽苔痕。
春愁不作遊人地。

細雨殘梅過上元

柳

含烟帶雨過平橋
嫋嫋千絲復萬條
張令當年緣底事
風流才似女兒腰

喜雨

天氣幽人一夜涼
故教微雨送斜陽
暝陰籠樹山更好
爽氣侵人土自香
多病不眠唯藥裹
居間長坐只繩牀
五年謬作江湖客
幾對鱸魚憶故鄉

舍東舊有花數百株自去歲大雨道路阻絕不復
可尋感歎成詩

無數新花替舊叢
兔葵高卧占春風
向來桃李成蹊處
今在陂塘渺莽中

送文潛歸因成一絕奉寄

水天空濶片帆開
野岸蕭條送騎回
重到張公泊船處
小亭春在鎖青苔

謝人送牡丹

晚風初染嫩鵝黃
小雨仍添百和香
折與病夫元不稱

玉瓶留待冶游郎

元一作渾

宿州初暑

暑氣侵人始欲愁
簟瓢窮巷不堪憂
亂蟬

缺

雨林塘靜

密迳吹花草
樹幽春盡茆簷深
着燕日高田水故
飛鷗
莫欺湫隘無餘地
待借元龍百尺樓

夏日書事

小行畏蛇蝎
端坐困蚊蚋
終日方丈間
茫然

原缺三字

豈唯

供病本魚恐添藥費小園新雨餘蔬畦共

原缺二字

飽聞磨

門柳清陰妙無對便思攜杖往行歌當游

缺

千秋陶淵

明此意渠亦會

寄吉州若谷叔

念我江西老斲輪久無漫鼻與揮斤千金莫買蛾眉笑

留寄溪堂病主人

溪堂無逸所居也是時聞無逸窮甚而吉州俸稍增故有此語

寄汪信民

時信民在京師有宗子博士之除

萬里江南雨外船長腰杭米縮頭鱖廣文繫馬無由去

更有何人贈酒錢

同諸子游城東園

昔聞城東園欲往常不款今來天氣佳茶甌起衰懶杖藜出門去如膜開病眼木葉犯新霜瓜田帶餘暖川源疑有無風雲遞舒卷不期魚鳥會偶逐鷗鷺遠淺水亂菰蒲荒亭秀苔蘚青山近在望更悟秋意晚同行二三子詩語各蕭散不愁罰觴難苦恨白日短千秋高陽池令人憶山簡

楊道亨畫竹歌

君不見渭川之陰卧龍橫千秋貌取者誰文湖州十年
筆意閑黃壤只今妙手唯楊侯楊侯畫竹盡真跡功奪
造化令人愁滿堂迴頭看下筆擾擾雲烟亂晴日大叢
縱橫高入雲斜風落葉秋紛紛小叢欹傾病無力傍水
長根走蒼石門前車馬汗成川何得原缺二字動高壁楊侯
嘻笑辭未工此意不與丹青同數原缺二字無一錢費酒炙
能使千家空戰材遠寄動盈屋我缺子畫無由窮剗

溪寒藤不難致須君放手為雙叢須君放手為雙叢與
我俱隱南山中

謝無逸秦處度諸人皆許省試後見訪冬夜有懷
作此詩寄之

八年去東都觸事無一好沈綿淹歲時憂虞滿懷抱欲
歸故里間稀復舊者老悠悠歲欲盡忽忽身向老小堂
佳有餘所恨來不早飢蟲語夜霜疎星亂衰草支撐壞
壁高側轉寒木小詩書久棄置詞林迹如埽佳人何時

來路遠音信少庭前冬開花扶杖起千繞春風回馬首
清尊待君倒先期留酒錢仍須具梨棗

歲晚

野竹新開徑疎籬自著行暮寒收雨雪落日散牛羊生
事顏公拙才名謝奕狂藥囊無奈汝春到莫相妨

寒一作雲

晚步至江上

大觀二年真州

浦口生春綠未酣南山初見碧嶺巖風聲入樹翻歸鳥
月影浮江倒客帆破甌不堪充酒券短蓑真欲換朝衫

往來泥雨城南路可見輕鷗定不凡

訪晁進道歸

樹陰殘雪半成泥尚想狂花一尺圍
小雨似酥

原缺二字盡

澄江如練白鷗飛未辭酒炙為公費
政恐親

原缺二字面稀

南市津頭行艤子無人識我醉中歸

怨歌行

借君手中板為君歌一辭辭中宛轉君不曉
為君說盡
長相思輕霜夜度吳城暖楓葉蘆花秋意晚
萬里春隨

驛使歸十年夢逐佳人遠當時笑語似兒劇象牀玉手
無消息古岸風江千里船咫尺春愁那得憐君不見信
陵門下客侯嬴不用今頭白

雪盡

大觀二年宿州

雪盡寒仍在園荒春欲歸晴空落雁小古木聚鷗稀肺
病猶堪酒囊空合曲衣碧雲愁不見千里故山薇

三月一日泊舟宿州城外因縱步至城北遂過天
慶觀道士留飲乃歸

冰霜連暮春既雨寒愈重扁舟纜荒亭淺水咽微凍今
晨稍和柔始覺芳意動經旬厭拘束樂事須一縱籃輿
無俗情鷗夷當賓從千花犯濃雲紅紫相餞送未知滕
薛長乃若鄒魯閨娉婷北門柳別淚作淒痛陵陂少荒
蕪亦未妨耕種道人喜我來清談破昏夢彈琴不須絃
風林助吟諷嫩玉擣香粳浮蛆撥春甕嘉蔬剪朝露奇
果市新貢西鄰亦可人明窓碾雙鳳人生一飽適此外
更何用七年城北交事與朱阮共長詩不成篇臨行當

三弄瓊瑤報木桃為子末

原缺二字

宿青陽驛

燈火客帆盡人烟村市幽晚風號古木高岸束黃流物
色淮山近春光霧雨愁棲遲舊游地來豁十年憂

游南山歸簡張嘉父博士

吾生復何往樂事亦匆匆寶塔千帆外春城萬壑中亂
花緣側遲晚照落晴空坐想西倉老掀髯一笑同

遲一作岸

書懷

拄腹文章未補飢積瘕潛愧不堪悲
兒曹怪我疎愚甚
不見田光盛壯時

客居書懷奉寄介然若谷才仲兼簡信民

客愁如長河浩蕩去不息未來已相關
千里在咫尺抱疾寄他鄉終年守岑寂
中虛耗神志內熱損筋力長虞二豎
櫻復有寒餒迫怪渠甑上煙愧爾囊中帛
平生所讀書已如不相識坐貽鄉黨笑
敢辭塵埃沒舊游今幾時轉眄忽陳迹
死者不復見墓草春已碧生者天一涯

未免陳蔡厄兒曹乳臭在瞋目分黑白雖無未見書頗
多雌黃筆出言輒周孔而不辨菽麥啾啾要酬和內顧
頗牽率坐令懷抱惡更覺天宇窄忽忽十年事俯仰同
戲劇從來肺腑親翻手胡與越獨餘二三子肝膽猶鐵
石尚怪東郭貧亦訝懷祖黠西軒來何時簞瓢共飢渴
念君不能已一飯再三噎誰能明予心皎皎霜夜月

小園

小園常在眼春事已天涯雨暗堤前路苔深林外家曲

池通小徑密樹隱殘花長愧隣翁酒囊空尚可賒

謁雍道士

雍有古畫甚衆盡為郡掾
取去雍游貴人門甚熟

紛紛乾沒混泥沙暫遣塵言掛齒牙妙畫已歸三語掾

妙畫一
作妙手

壯游空記五侯家古壇背日藏芳草小樹留春

放晚花能共山翁同活計隔林分聽一池蛙

暫遣一
作不遣

春日即事二首

隱几虛堂俗客稀片心真與道相宜風搖柳帶千絲亂
雨勒花心十日期瘦病纔蘇休強酒良辰雖好少題詩

賈生詞賦常流落歸去來今在幾時

病起多情白日遲強來庭下探花期雪消池館初春後
人倚欄干欲暮時亂蝶狂蜂俱有意免葵燕麥自無知
池邊垂柳腰肢活折盡長條為寄誰

寄前鎮西楊法曹

楊子文章老更新狂吟寡和過陽春雙聲疊韻俱難敵
指物程形似有神畫馬已無韓幹肉草書真得伯英筋
可憐一首閒居賦解道連蜺能幾人

飲酒

人生百歲能幾何顧我把酒胡不歌窮通大抵夢南柯
我復夢中多蹉跎自古英雄亦何有往事紛

原缺二字

如酒

嗟予真得酒中趣幾度尊前揖星斗病起槐陰鸚已老
今日相逢還草草忽忽數日是行人且向尊前一傾倒
人生樂事亦難并明月清風況都好

讀史

陳壽謂諸葛將略非所長私恨寫青史千古何茫茫謗

議終自破公論不可當是非倘可定青蠅果何傷

戲呈七十七叔

大阮愛我詩謂我能詩矣我詩來無極愛之終不已吾
非聖者也但智慮多耳賜始可言詩吾智由商起

偶作

去年芳草又萋萋休歎王孫猶未歸更見春深送春鴈
三三兩兩傍雲飛

謁陶朱公廟

悠悠千載五湖心古廟無人鎖綠陰為問功成肥遯後
不知何術累千金

睡

終日題詩詩不成融融午睡夢頻驚覺來心緒都無事
牆外啼鶯一兩聲

夢

夢入長安道萋萋盡春草覺來春已去一片池塘好

讀陶元亮傳

我愛陶彭澤解言歸去來醉眠猶遣客却使世

原缺二字

我愛陶彭澤不求絃上聲琴中如有趣曾遣幾人聽

寄壁上人

出門厭交情袖手看世故紛紛駒過隙忽忽豹隱霧生
平喜退縮未到心已悟尚餘好事人相就討新句雖非
琢肝腎終自費調護君看雪霜根豈受桃李妬胥疏老
支離骯髒舊賓傳何由兩行纏遠泛一大瓠從君乞妙
語一洗詩酒污

寄壁公道友

符離城裏相逢處酒肉如山放手空已見神通過鷺子
未應鮮健勝龐公且尋扇子舊頭角一任杏花能白紅
破箬笠前江萬里無人曾識此家風

用前韻寄商老

先生昔據道玄峰咳唾珠玉家為空只今江西二三子
可到元和六七公雙髻只期他日白千花猶是去年紅
須君吸盡西江水不假扶搖萬里風

道玄一作通玄
扶搖一作鵬搏

又寄無逸信民

文字撐腸不療窮詩來想見左書空雖非問道睹狂屈

壁公數譏二子學道不進

猶勝遺書訪子公銀杯久拚浮大白桃花

且看舒小紅記取浮盃無剩語他年說似馬牛風

奉荅壁公兼簡諸友

江山取別太匆匆對面難尋一段空顧我自無

原缺二字樣

如君合是黑頭公客塵衮衮催前浪俗眼紛紛替舊紅

炙日茅簷那接膝重來肯借一帆風

得李去言詩次韻荅之

歌呼屢回曹相國
戕書或似魏司空
半生懷抱向餘子
千載風流獨此公
未用反身藏白黑
更須着眼辨青紅
無人與助求田費
雅稱謝家林下風

督山伯蕭遠和詩并示舍弟

愛閒多病老封戎
看子垂天上碧空
懶惰未須攀此老
典刑政爾賴諸公
鬚如震澤三春渌
詩似芙蓉五月紅
坐此逃禪夫可恕
不應獨許我乘風

用寄壁上人韻寄范元實趙才仲及從叔知止兼

率山伯同賦

故人瓶錫各西東
吾道從來冀北空
病去漸于文字懶
南來猶覺歲時公
江回夜雨千巖黑
霜著高林萬葉紅
政好還家君未肯
莫教慚愧北窓風

是時范元實游蜀未歸知止得官潁

川趙才仲在郢久不聞耗三子皆奇士故以北窓風諷之

夜作呈諸公

風江舞暮帆
野樹散歸鳥
寒燈上壁角
疎星綴林杪
歸

來靜無事獨坐搜點藁放筆有新功無人與傾倒不知
新恨多但覺舊愁少石鼎倚殘爐茶煙看清裊明朝尋

酒錢折簡喚諸老

野樹一作遠樹

東萊詩集卷一

欽定四庫全書

東萊詩集卷二

宋 呂本中 撰

山陽寶應道中與汪信民兄弟洪玉父杜子師張
益中日夕過從自過高郵不復有此樂也因作
此詩寄懷

日日南風沙打圍掛帆端為故人回長空渺渺水無際
遠樹冥冥花自開疾病久辜鸚鵡杓江山稍近鳳凰臺
月明雪霽山陰道尚想王郎乘興來

李太白有鸚鵡五
鷗杓二物名雖

異其用則一也故得借用亦以發諸公一笑

春日

春風未雌雄尊酒自賢聖燕巢樓閣間鶯語花柳靜

知止歎傲軒

貪夫九鼎猶不足淵明一軒長有餘人生趨向等天壤
鷗嚇腐鼠猜鵩雖中郎妙處世不識風期自與常人殊
開軒便有千載韻友葛天氏無懷徒坐看松菊換時節
兔葵桃樹紛榮枯五年却走各南北千里懷想空煩紆

雙魚沈浮久不至三徑寂寞今何如文章潦倒付丘壑
疾病蹭蹬思江湖何時共坐北風裏煩君小摘園中蔬

暑夕乍涼二絕

三旬埃鬱得清風領袖猶翻汗摺紅已是夢清無俗夢
更移涼簟月明中

暮蟬蕭瑟下斜陽已似茅簷氣味長團扇未須憂棄置
竹奴猶可助清涼

寄知止二絕

少年樂事未全諳疾病侵凌已不堪尚喜步兵頻入夢
夢中猶復似曹南

竹林還往風流絕剡縣交游氣味疎今代高人多惜費

千金未抵一行書

去秋知止與石子植皆
許見過已而俱不來

游北李園三絕

雨映煙籠萬竹蟠枯條高下不堪看非千秋後多霜露
自是芙蓉不耐寒

去馬來舟絕往還此中情味却相干明年知是明寒食

待約花梢月下看

壁間詩字有凝塵
庭下梅梢又作春
獨有城南缺教授
當時同是看花人

游北李園

小徑縱橫出紫苔
綠陰高下綴黃梅
榴花却是多情思
留宿薰風未肯開

寄李愬去言

東南之望廬山英
李郎落落奇後生
鳳凰麒麟在郊藪

芝蘭玉樹生階庭文章初如濫觴水行見萬里通滄溟
汪侯愛君筆不停謂君詩似秋風清世間兒子甘縮手
蘇過趙栴俱抗行少年才氣乃如此後來定是賢公卿
伊昔先朝文物盛君家諸父當朝廷外兄復是不世才
奇祥異瑞相輝映翻雲覆雨十年後昏昏醉夢須君醒
我生未壯日向衰疾病侵凌心已灰眼中之人不易見
千變百技常追隨詩書深藏半鼠矢筆墨高卧封蛛絲
功名已矣付公等田園肯放吾先歸

贈汪莘叔野

汪子宦不達四海漫聲名有弟極磊落氣宇和而清三
冬文史足十年書劒成出言見瓌頴府庫森五兵於身
則已拙泛如池中萍輕肥置度外辛苦抱遺經乃知佳
子弟必由賢父兄念子初來時我方疾病櫻相從四寒
暑所歷不可聽昏昏醉夢裏得君時缺醒擁爐共殘火
軟語當盃鐺君亦不我厭為我雙原缺二字勿云軀幹小氣
吞橫海鯨懸榻念文舉開運憶淵明二子風流遠感君

兄弟情窮通有時節此士爾勿輕

新冬

西風吹禾黍落日在陋巷杖藜訪新冬霜樹眇空曠人
煙村舍西行旅古原上晚山晴更好秀色常在望居閒
得真趣日欲就疎放豈惟憎俗徒庶自免嘲謗東鄰酒
初熟清香亂盆盎徑須騎牆頭挈榼獻窮狀吾生足羈
旅久病非少壯銀杯多羽化布帆且無恙雖非陶潛隱
不負徐邈暢

多一作驚
且一作保

贈謝無逸

君不見城南千樹桃君不見澗底百尺松
松生偃蹇卧霜雪桃李一笑隨春風
百年澗底終自若桃花猶得暫時紅
嗚呼志士每如此衡門高卧不見用心
雖無瑕飢欲死

贈張若虛

病憶江湖去書無尺寸工
平時宴人子忽是富家翁
活計呻吟裏交情夢寐中
獨於張處士相近數過從

贈信民

五年客符離端坐受貧病從來疎出門今乃懶成性官
多豪富郎分明與時競取醉不論錢定無塵生甌豈但
相娛樂頗復自賢聖汪侯雖官居笑語怯原缺二字折腰衆
人後瓊林自輝映背後足官府眼前謬原缺二字偷閒過草
堂遣興眯眼淨雖非醉紅裙清談却差勝秋高數能來
勿厭阻泥濘

又

符離之民難與居五年坐此如囚拘比屋生涯但剝劫
諸生學問只鄉閭南鄰經年不相見北里雖見復粗疎
窄衣小帽走塵土也復生貌施襟裾對此自然憂氣滿
疾病日益何由除君不見圖經所記又可哀此州自古
無賢才

探梅呈汪信民

縞帶銀杯欲着塵小園幽樹已含春風流王謝佳公子
臭味曹劉入幕賓細朶定無泥土浣暗香猶帶雪霜新

剗摩枵腹搜奇句去惱城南得定人

泥土一作塵土

奉懷張公潛舍人二首

顏子置身陋巷屈原放跡江湖何似我公歸去馬羸不厭長途

腕中有萬斛力胸次乃千頃陂字畫顏行楊草文章韓筆杜詩

荅無逸惠書

三年讀書少餘味燈火可親病為祟謝侯好事憐我窮

時遣雙魚問憔悴交情乃似親骨肉學行坐越諸公輩

胸中萬卷書屈蟠少日力戰登詩壇下帷

原缺二字

謝俗子

凍吟不管兒號寒只今食粥已數月千慮百憂煩筆端

高才本是棟梁器苦語終無儒生酸樂章短句又清絕

陶寫萬象嘲江山江南草木不得閑問君何為愁肺肝

十年行坐想風采千里魂夢勞追攀我無良田歸不得

忍窮氣味君應識囊貯未了歲寒計學道空愧琳與璧

交親零落半鬼錄白日輕去真可惜終朝撥火煮蘆菹

南山之南待君喫

寄知止才仲

一門將父到卿好中表弟兄惟爾賢往事關心空自語
新詩好句與誰傳溪山已近堪投老文史雖窮莫取憐
仲弟墓頭今宿草為渠先賦補亡篇

寄張益中

五年望張子兀坐四壁空今晨千里來如熱濯清風笑
談不改舊憐我衰病攻斯人舊豪氣頗似陳元龍只今

更省事終歲兩頰紅何知珊瑚樹却倚塵埃中
泉侯夙所敬見渠如見公網羅枝出脚遠逐冥冥鴻
同會得玉郎敲門夜相從殷勤一盃酒目送西歸鴻
人生少如意此樂難再逢君家老季鷹高韻留吳淞
風流遠孫在權何時東不嫌道里遠為我略從容

元日贈沈宗師四首

大觀三年真州

東家起傳觴西家起相喚我亦了新詩成此奇一段念
無毫髮益但見日月換出門語沈郎造請我亦漫

念昔從諸賢關汪老者舊是事今則無斯人亦難又爾
來見公子却立兩公後不倦以終之可以為子壽

沈郎固可人好善乃天性迹隨萬事遠心與一物定蕭
然四立壁筆墨自溫清更持孟賁勇少折楚士脛

君無綺紈氣我有冰雪容相期五石瓠共濟萬里風江
山秀句在內子空洞中還身視塵滓當有一日功

梅

南雪看未穩北風吹已殘才堪十年夢不稱一生酸日

月方回首風霜與凭欄遲明出謝客頓覺帽圍寬

苦陰

破牕冬仍在逢正陰更頻寒流未解凍雪意欲妨春畏
病還疎酒逃寒懶見人郊東小桃李還是一番新

還一作別

贈浹上人

一菴便送淵明老四海共傳摩詰詩本自妨人枕邊夢
不能陪汝劒頭炊交游大半飢寒裏疾病中分少壯時
西寺木魚東寺鼓三年三見浹闍黎

正月十二日夜作

春來消息未真傳，久負蒲團一味禪。
燈火侵尋作佳境，冰霜偃蹇過新年。
江聲悞落三更雨，野色遙看萬斛船。
咫尺風光不相貸，忍令好語到愁邊。

咸安公主

漢朝公主歌黃鵠，秦地佳人唱柳枝。
想見雲車度沙漠，一盃潼酪酌明妃。

明妃

秦人彊盛時百戰無逡巡漢氏失中策清邊烽燧頻文
夫不任事女子去和親君王為置酒單于來奉珍朝辭
漢宮月暮隨邊地塵鞍馬白沙暮旃裘黃草春人生在
相合不論越與秦但取眼前好莫言長苦辛君看輕薄
兒何殊異地人

正月十三日河堤上作

雨着河堤柳着煙小樓燈火又今年東風不與行人便
留滯長亭十里船

昨日晚歸戲成四絕呈子之魚煩轉示進道丈

疎燈欲盡漁商市
小雨似開桃李顏
一夜簷聲鳴甕盎
無人知我坐蒲團

卧疾江邊久未回
懶隨兒輩走塵埃
天公尚有餘情在

肯放梅花自在開

疾一作病

春愁故故妨人樂
舊蘚新苔不暫晴
想見江郎閉船卧
滿川風雨報天明

晁卿白髮風流在
肯伴香車作夜遨
借問典衣充戲責

何如沽酒喚吾曹

上元夜招沈宗師不至聞已赴郡會作二絕戲之
燈火滿城公不來為公雕句洗塵埃
春愁不到城西寺
更約梅花緩緩開

白酒紅燈稱意春
知公未免踏黃塵
繩牀好在休相憶

輸與瑯琊浹上人

白酒一作潒酒

浹上座求枯木菴詩戲成兩絕贈之

枯木菴中浹道人
百年無影卧輪囷
未須特地通身去

放取枝條自在春

前身石霜後身浹如印印泥風去塵認得當時侍者意

無人知是密菴人

密菴人一作呂居仁

正月末雪中小酌

柳着河水雪着船小桃應誤取春憐牀頭有酒須君醉

又廢蒲團一夜禪

次韻張生

密菴居士渠不識齒髮則衰心未然樽下不知公子貴

酒中差覺孟生賢已吞舌本三千丈却住人間五百年
觸忤風光君莫怪棒頭無地可逃禪

追成舊作

滿江風月一船霜無計留君只自狂燈火隔簾香隔坐
無人知是竹枝娘

久不得才仲書因成二絕寄之

望大趙書如渴驥憶老汪膠無續弦看徧江南與江北

小屏微雨是斜川

小屏畫淵明孟夏草木長詩

病去詩無一點塵亦知摩詰是前身
憐君更似西江水
合伴倚松菴裏人

晚晴

斜陽入花柳渾欲不勝情
春事乃如此病軀安得平
尚堪衝宿酒復作快新晴
荒簷足烏鳥莫厭晚來聲

安得平一

作殊
未平

連日與一上人會話密菴清
坐附火乃有山居氣

息因成

春風吹茆簷落日半花柳餘寒盛氣來佳辰為誰有公
來但默坐有味皆可口端如列鼎食衣被以醇酒煩言
不知要實自費斗數南泉山下人了不計可否山柴晚
復焰當為一舉手荒江甚沈寥此味亦長久不嫌薰病
眼重當為公取

一上人屢言瑯琊南塔之勝予蓋樂之而未能往
也

二頃良田一畝宮好山當自屬林公須君留我卓錫地

安聽颼颼萬壑風

夜坐有懷

西還豈不好本自乏周旋道有魯一變歲無官九遷疾
風驚半夜惡況極今年咫尺沙頭路猶堪著釣船

晚春即事

春色不自惜曉寒摧折之殘花帶雨去薄酒信風吹尚
有尋行債初無了事癡論詩得奇味當使阿戎知

廣陵道中寒食日

風雨屬連春事休
碧鱗三尺薦行舟
短牆不見桃花面
付與長江自在流

南來消息不真傳
正恐相逢却未然
何處青帘足沽酒
粥香餠白是今年

就甯子儀求酒

鼻息咈然君莫驚
飢腸渠自作雷鳴
須公一勺羔兒酒
伴我夜窓聽雨聲

東萊詩集卷二

欽定四庫全書

東萊詩集卷三

宋 呂本中 撰

廣陵

借韻戲用
文潛體

往來六十里各是一江郊柳色團渦岸春風揚子橋好
山當斷岸野鳥度空巢一任雷塘路暮天風雨號

沈宗師甚喜江梅而微貶酴醾因成一絕

淡綠衣裳玉作粧好風涼月自相當沈郎笑汝多情在
不似江梅滿意香

勸張李二君酒

張侯好詩如好色不敢為主而為客李侯好酒如好詩
心雖甚壯無人知兩侯風味俱不惡如芙蓉與木芍藥
午窓留客看筆快曉枕無人猶睡着廣袖漸變天寶粧
大字不作元和脚世人譏笑乃其分政是仍叔之子弱
病夫坐隱無所求荒簷斷雨鳴春鳩爐烟未盡消百憂
恨不緩帶從公游何時清江橫小舟與公一醉荻花秋
却來密菴參牧牛

菴居

鳥語花香變夕陰
稍閒復恐病相尋
正應獨有江山分
素自都無廊廟心
堂上老親雙白髮
門前稚子舊青衿
兒曹不會菴居意
古澗寒泉疑至今

小園即事

千花老無蹤
衆草來可喜
欣然得幽尋
我亦病良已
飛飛兩蝴蝶
不悟塵土裏
禽聲甚可人
亦似相汝爾
人生貴
愜志不必須
甚羨三年白
沙詩已費
千幅紙問君何

所樂赤手費磨洗短屏看遠山心作千萬里此豈畫者
功實自一念起君當如是觀在此不在彼

登舟

夜雨曉猶滴怒風晴更吹已無行役念寧有別離悲舟
楫三年路江山一月期東菴舊還往不廢百篇詩

張棹秀才乞詩

白蓮菴中張居士夢斷世間風馬牛風塵表物自無意

神仙中人聊與游

張舊與前輩名士往還甚衆

澄江似赴北城曉苦

雨不放南山秋君當先行我繼往向吳亭東留小舟

效古樂府三首

君住長江邊妾上長江去長江日夜流相思不相顧

住一

作家

長江日夜流妾心終不改誰謂江頭人相思不相待

東家石榴紅西家石榴紫俱是一種花同生不同死

讀太真外傳

上盡馬嵬路東風吹舊京乾坤已新主草木自秋聲錦

鞭千年恨皇輿萬里程寧知挽船士亦有別離情

簡甯子儀二絕

只恐老去被花惱更欲忘憂須酒澆何似山堂病居士
閉門高枕過春朝

新晴欲上南樓月柳可藏鴉水蘸牆無限客愁芳草裏
不知風雨阻斜陽

書寄浹上人

胸中無一毫事筆下有千斛力走徧江南江北山滿堂

禪和不相識

呈愚上人

不能歸續侍中貂遂有聲名伴老饒
萬里更行看驀裏一枝才足賦鷓鴣
詩囊硯礪君其漫藥裏侵尋我亦聊
舉目雲天盡新語殷勤收寄一牛腰

贈浹上人一上人

君行南山南我在北山北不聞浴鷓鴣
白但見染絲黑老境欲垂垂快意須得
得孰知百雉堅而有一日克浹如

澗底松縱老終不踣一如雲間鶴不復可羈勒我如千
里風遇此兩鴻鵠明珠脫氛翳曉日破昏塞宿障不盡
除胸次猶筆墨君看說詩口乃是拔山力冷霜卧偃蹇
歲月飽封殖誰能窺藩籬未易得閭闔政當歛光芒不
必須緣飾相從無何鄉敗衲依破襪更令好事人妙語
添一則

政當歛光芒不必須緣飾一
作政當磨其鋒共埽煩惱賊

雨後月夜懷沈宗師承務

雨雲攬江色偃蹇破昏睡千花閉紅紫妙見一室內披

夜行夜永明月在船背微風過蕭瑟古柳立蒼翠脩然
一蒲團堅坐覓詩對我生無南北所到意趣遂孰知十
年游保此清淨退頗念城北人結友老杉檜漫隨長鋏
歸甘作短檠棄出門萬里塗已駕安得稅何當持被來

把酒相就醉

開一作開

秋夜示李十

晴鳩不時鳴雨鳩不暫歇相去跬步間屢見屐齒折寒
泥擁衰草秋扇罷殘熱今晨好風景稍貸屋頭月清光

冷相照玉豔滿金玦喚客坐前窓文字相澡雪殷勤傍
詩律未暇了麴蘖瀾翻談經口邂逅如意鐵我歌君輒
書字字有行列不須陞栢巖但要兵衛設譬如南山石
琢齒當井渫真成一戰霸未可三鼓竭人生各湮渭世
事亦勝薛高堂食肉人兩馬方蹠齧何知緼袍底猶有
不安節

中秋日沈宗師約游城西泥雨不果因成四十字

兼寄趙才仲

遂阻城西步魚懷雪上游長風掠歸燕苦雨應鳴鳩月
向誰邊好寒催社後秋傳杯有新韻能憶老兄不

桃花菊

嫩粉殷勤換淺黃鬱金叢裏見新粧已翻百疊紅衣潤
更沐九回沈水湯

九日晨起

漸歇毆蚊手真成把酒天長河印曉月老木聚荒烟了
了江山夢區區文字緣南塔兩三菊極意作今年

王氏郊居

江山處處好落日極登臨
雨續蔬畦潤風吹柿葉陰
客船頻上下水鳥故浮沈
尚有南飛鴈丁寧可寄音

對菊

稚子尋花莫漫狂已知衰疾負重陽
新霜有意留青蕊更放殘枝十月黃

雨後至江上有懷諸子

落日滿寒雨長江收夕霏
定知聊復爾敢望不相違
野

鳥晴相喚殘螢晚自飛殷勤兩山口好為放朝暉

登南樓

疾風吹沙不成雨十日狂陰倒殘暑江頭樹木半焦枯
不厭潮頭洗塵土南樓反照千丈紅落日却在洪濤中
舟父漁子莫惆悵更借朝來東北風

歲晚作

南山雪雲千丈高北山晚田無寸毫富兒巨家飽欲死
笑我陋巷長蓬蒿道人坐穩忘作勞百念解縱如垂橐

但當折簡喚我曹並坐擇蝨煩抑搔筆力可借秋江濤
莫學人間膏火熬

弔古塚

荆榛閉莽蒼千歲一孤墳生則無是叟死應冥漠君略
無他日念唯有不堪聞想得西陵道荒臺亦暮雲

奉送子之還京師

日月老投閒文字今削跡便然腰十圍欲吐喙三尺頗
懷平生友相就語肝膈諸江好兄弟夫子眉最白詞林

三二公子實門下客布帆千里來許我間賓席階庭出
蘭樹戶牖照圭璧詩如駕高浪萬頃隨筆力寧為首陽
餓不作嬖奚獲乃知工語言要是飽糠覈茫然李杜壇
未免陳蔡厄出門觀善陣斂手避勍敵澄江搖夜霜歲
晚見沙石釵頭罥蛛絲即有梁宋役士生多艱虞道遠
自古昔相期逍遙游不計天地窄名聲了三黜談笑供
百謫別君為此言可當繞朝策

外弟趙才仲數以書來論詩因作此答之

君才如長刀太窵當一割正須礪其鋒却立望容髮平生江海念不救文字渴茫然攬轡來六驥仰朝秣病夫百無用念子故踈闊未能即山林頗復便裘褐前時少年累如燭今見跋胸中塵埃去漸喜詩語活孰知一杯水已見千里豁初如彈丸轉忽若秋兔脫旁觀不知妙可受不可奪君看擲白盧乃是中箭筈不聞鐵甲利反畏彊弩末興薪導大路過眼有未察君能探虎穴不

但鬚可捋

才仲佳士也年十七八時隨其父演在定州子開及晁四諸人比其文柳子厚

過子之泊船舊亭

江郎泊船處草徑不勝秋客裏終年別春前萬斛愁山
橫采菱口月滿望江樓政可夢春草莫令吟白頭

望金陵偶成兩絕

臺城南望入斜陽尚想能詩玉樹郎乘興風流莫相笑
眼看直北走雷塘

雷塘別有風流坐可作南舟兩日行江水自流春自好
不知芳草為誰生

烹茶

水光欲盡瑠璃影玉色初浮翡翠斑
便覺麴生風味好
小爐新火對蒲團

西樓

小院無人日自長
隔簾時有芰荷香
客游未作安居計
更借西樓一夜涼

寄信上人

笑語三年別舟航
千里淮新霜
變草木好雨過
風霾萬

事不如意一生常好垂何因伴明月特地入君懷

秦處度與一上人同宿密菴處度為一畫斷崖枯

木

小菴無客亦無羶遂有高人借榻眠一夜西風撼枯柳
不知春在石崖邊

寄謝無逸并汪叔野兄弟

老謝風流綠綺琴小汪兄弟亦南金文章已悞半生事
江海略酬他日心好酒不當愁偏仄舊書差慰病侵尋

平生恩義伴宮老斷縷寒泉百尺深

汪信民沒方數月

月下

白鷗笑汝不能飲澄江惱人勤作詩可惜南樓好風月

只無春柳對瓊枝

汝一作我

劉穆之

金樽一斛貯檳榔戲調兒童走欲狂不謂林間有元亮
念公時在酒中藏

戲贈浹上人

忽逢邗溝道人淡如見錫山居士秦問着世緣渾忘却
知公不是箇中人

喜章仲孚朝奉見過十韻

苦語不難好舊交今則無但能留客坐已勝折腰趨只
有連根煮初非滿眼酤苔痕記拄杖雪影傍跣趺語道
我恨晚說詩公不迂丁寧入漢魏委曲上唐虞歷歷有
全體匆匆或半塗真當置度外不敢望庭隅日月換新
歲江山非故吾他年佳句在與畫密菴圖

山谷論作詩
法當自舜臯

陶賡歌及五子之歌以下皆當精
考故予論詩必斷自唐虞以下

觀甯子儀所蓄維摩寒山拾得唐畫歌

君不見寒山子垢面蓬頭何所似戲拈拄杖喚拾公似
是同游國清寺又不見維摩老結習已空無可道牀頭
誰是散花人墮地紛紛不須掃嗚呼妙處雖在不得言
尚有丹青傳百年請公著眼落筆前令我琢句逃幽禪
異時淨社看白蓮莫忘只今香火緣

寄朱時發

菱橋脊梁硬如鐵天下拄杖打不折倒騎佛殿出三門
南頭學來北頭說昔苗未生今作米更判阿師三尺觜
公但吸盡西江水莫怕庭前簸箕尾

簸箕尾事出
小釋迦錄

寄穎昌諸叔

身如許縣老聾丞心是江湖版下僧萬事聊憑曲肱夢
一尊時近短檠燈舊游可數終難又惡況雖多不厭曾
尚憶少年情語否夜窓相對髮鬢髻

心是一
作心似

謝人送瓊花白沙人謂瓊花為無雙花戲成兩絕

凝塵欲滿讀書牕忽有瓊花對小缸更喜風流好名字
百金一朶號無雙

斷腸風味久難尋尚有名花寄此心折盡長枝已春晚
只宜涼月不宜陰

觀甯子儀朝奉山堂諸石三絕

箇中真味久難忘但覺人間萬事忙今日為公留不得
剗分詩思入山堂

向人懷抱終何有過眼崢嶸得暫醒更喚秦髯與前

被為公題作小南屏

知公心似山堂石，悞落人間几案間。
今日風光已相負，看朱成碧未能還。

十一月五日與才仲弟相別于白沙東門之外，悵然久之，不能自釋。乃知謝安石作惡之語，不為過也。因成八詩奉寄，可見別後氣味，亦可并示京洛間親舊也。

終年想顏色，未有食頃忘。君寧不我念，苦畏冰雪妨斯。

文百戰罷閔士如堵牆孰知五湖口一葦可以航

君才不長貧太阿之在匣故知讒慝口不受龍象踏此
道有從來骭骭端不乏相期甕頭春夜語重一呷

盛欲與子談乃復為此別忽忽得餘歡把酒到耳熱人
生不如意肝膽有楚越何知若人胸中有積立鐵

伯姑無恙時令我與子友周旋以至今各是遺種更文
字重聲名于身亦何有還書問兩弟是事君識否

婦如先姑賢兒似乃翁好識君相與心見我亦傾倒頻

年作離情悟賞到丘嫂卜鄰洛水陽此語當在早

低頭拜東野未厭撻挾窮停車問縮酒不計牛馬風胸
次絕塵滓欲與秋水同斯人未遽遠當在阿堵中

往者汪信民愛我不自勝以我如古人得與子並稱若
士不復有斯言當伏膺期君極膏沃更作無盡燈

鍛以百鍊剛淬以萬里流閉門待彊敵忽見天地秋以
石投水中萬歲終不浮堂堂倚松老于今忘百憂

東萊詩集卷三

欽定四庫全書

東萊詩集卷四

宋 呂本中 撰

山水圖歌

君不見南江老龍夜不眠令我破屋開青天千巖倒壁
卷角上一榻却在洪濤前又不見江頭古木一尺圍猿
猱接手懸高枝雨中寒蘆披靡去天際風帆先後歸陳
生故是可憐人筆雖未到心已親南村北村渴欲死怪
此一室無纖塵鄭虔祁嶽不解奇韓幹畫馬空多肥萬

里咫尺君得之更看湘江雷雨垂

陳生欲畫湖湘圖

庚寅年正旦郡中客次作

曉霜挾霧入寒廳四座伊優不暫停
剩欲禪房作新歲念無餘瀝到空瓶
談諧與世聊從俗嘯傲他年可乞靈
更為旁人住俄頃坐間愁殺兩螟蛉

題李伯時維摩畫像圖

老松攬天四無壁小菴不勞容一室
野竹入戶芭蕉肥下有無言病摩詰
文殊妙對亦未真身如浮雲那得親

驚倒同行問話人
彼上人者何所云
龍眠好事筆有神
不避世間狐兔羣
埽渠胸中千斛塵
多口阿師聞不聞
掃渠一作洗盡

遣懷三首

何山不堪隱
何家不可居
古來子華門
亦着荷畚夫
荒田脫積雨
未免供晚租
今日視昨日
但見有不如
故人勸加食
老親憐嗜書
寧知毛錐子
不可一日無
無一作一日不可

秋風襲殘暑忽過江上林旦日扶杖來不見十畝陰蔬
畦甚寂寞亦受霜雪侵念此不常好如我宿昔心濤頭
落崩岸野鳥助謳吟潛魚着沙底避網冬更沈

饗一作麀

異時忘言人馬鬣今宿草生平不如意欲伴寒木槁遂
令藜藿腸更盡組繡巧三年對空案誦子詩可飽從來
文字工不解顏色好相逢期後身再訪西院老

謂信民也

符離阻雨

東風吹船窓未曉天復雨篙師促添纜卧聽泥濘濘不

知城北園春事今幾許舊游如宿昔花柳默可數鄰里
先後來頗復相勞苦東家獻牛酒西家饋雞黍感渠長
久情愧我無所取汪侯哦詩處積水敗環堵念此不忍行
不但出入阻七年此端居畏病如畏虎故人饒與黎此
老可出語

伍員祠

伍員廟前一大碑上有野鶴雙來棲水雲杳杳涼去遠
風雨冥冥秋到遲江花相趣野花發舊燕不隨新燕歸

大夫遺恨竟何許楚越勾吳今是非

東園

垢汙久思出江山秋更新荒田拆龜兆老檜落龍鱗風
月猶堪夜蒲蓮浪作春籃輿亦垂興實自厭冠巾

寄琦監院

往時濟陽晁公子今日靈巖琦上人千山不礙一月曉
北樹忽見南枝春箇中有味渠不識底處無情公得親
不知碧眼之面壁何如黠顏西入秦

即事戲荅季一

斜陽着高柳環堵半黃昏小圃三年旱荒池一尺渾粗

知詩有味寧使婦無禪不信晁公子猶招楚些魂

季一詩云

思與諸公論人物
試憑清議賦招魂

湘竹

小雨催寒入夕曛湘江風味可憐人斑斑玉淚無時盡

裊裊金梢別是春

有懷宿州城北因作詩寄才仲

宿州古城城北隅雨罷晴開如畫圖雜花亂蕊未須道
白杏一枝天下無香風裊裊入短袖明月蕭蕭隨蹇驢
二年不復見此樂清江萬頃正愁予

示沈宗師

十日兒號不出房殘梅猶在小瓶香沈郎喚客煮湯餅
政恐匆匆未得嘗

九日狂陰一日晴落花飛絮作清明與君攜手南樓去
共聽長江月下聲

夜坐戲成兩絕呈迪吉宗師二友

夜窓燈火著新寒喜見蒲團一味閒縱有好詩人不要
却須還與檻前山

疎簾欲上梧楸影遠枕微聞盆盎鳴甚欲分身就公宿
只愁塵土變江聲

戲成兩絕奉簡章仲孚兼呈宗師

日日勃鳩相應鳴年年春草趁愁生道人不怕冰霜面
又作南舟十日行

沈郎愛客如愛酒章子問詩如問禪肯共寒爐撥殘火
共搜佳句作新年

老松

奉君以綠綺琴報我以雙南金盃中琥珀不須盡聽妾
一聲行路吟君看庭前老松樹上有杳默不斷之清陰
牆低未礙髣髴古歲晚不辭霜雪侵東園桃李自妍好
與君百歲同此心

揚州雍熙寺納涼

高樓有餘涼但見旗脚動鳥語簷角來仰聽風響弄江
山舊還往草木老賓從平生一笑適可得萬鈞重脩然
六尺牀更許佳月共

訪張鑑秀才兄弟

眼看霍霍萬錢食便就忽忽五鼎烹何似張侯五兄弟
閉門相對飽芹羹

邵伯埭路中

行前蒲柳後鷗鳥乃似白沙之舊居忽見雲天有新語

不知風雨對殘書
往來河樹幾傾蓋
上下江船如貫魚
更與河山結香火
夜窓重枉故人車

寄周司理

日月走動勦舟楫
卧煩暑涼秋在萬里
客子安得語周侯
磊落人憐我自熬
煮殷勤半月留
可得一笑許別來
今幾日坐此百里
阻清風不時來
曉月仍半吐
卷簾看脩竹
忽似對眉宇
人生行樂耳
舍此皆自苦
終期卜隣歸
重聽對牀雨
雖無鳴鳴歌
亦有坎坎鼓

山光寺前泊舟值雨

輕雷喚小雨憶在白沙時綠酒留連醉紅燈取次詩好
風那復有涼月自相隨獨上山光寺清歌無柳枝

步月有懷

平生最愛花梢月可與青樓一等看病去老來渾忘却
曉窓晴日上蒲團

揚州留一上人

日日東風吹客衣小園春在掩芳菲殘花過雨飄零盡

好鳥穿林自在飛往事虛成采薇瘦故人頻有食言肥
知公未厭西行晚且伴江船緩緩歸

送一上人之京師

東風吹雲十日雨卧聽城頭打衙鼓道人遠自山中來
共坐南窓濯泥土自然高韻到羲皇豈止微言變齊魯
萬牛回首不震掉一葉橫江且掀舞未能入水取蛟蜃
尚欲投戈代貔虎念公守此非一朝木病魄魂無枝條
已盡千峯西嶺雪更夢八月錢塘潮京城塵沙深一尺

是中莫留公履迹權門噂噉兒女笑我一思之不能食
片帆無事早歸來為公一洗山中石

擬古

狡兔死三窟老松堅百尋物生各有願共此分寸陰荒
城六月旱長江三日霖稻苗不遂死幸無蟲賊侵皇天
不私覆一語銷百壬先王典刑在落落傳至今願以小
人腹而為君子心

寒雞不能晨苦雨自朝夕上為雲雷巢下乃龍蜃宅坐

懷陰外天缺月掛殘魄少來可喜人牖戶陳玉帛平生
千萬言略省二三策牛山所種木日在斤斧厄念君十
年心使我雙髻白

潘邠老嘗得詩云滿城風雨近重陽文章之妙至
此極矣後托謝無逸綴成無逸詩云病思王子
同傾酒愁憶潘郎共賦詩蓋為此語也王子立
之也作此詩未數年而立之邠老墓木已拱無
逸窮困江南未有定止感歎之餘輒成二絕

漫營新句補殘章寄與烏衣玉樹郎他日無人識佳景
滿城風雨近重陽

好詩政似佳風月會賞能知已不凡萬里潘郎舊鄉縣
半江斜日落歸帆

寄李商老

竹不可一日無酒不可飲不醉平生嗜酒愛風竹此意
不許凡兒會南來經年飽塵垢袖手甘隨百夫後文章
漫作無功身只了兒曹補牕竇黃沙障日江漫流青山

喚我十年舊憶昔泊船鵝翎口把酒遙為故人壽只今
身在心已老千巖想像靈芝秀君家兄弟固不凡解
挽二友勤相就中郎卧病過春晚昔則酒在今詩瘦山
房大名不墜地諸老風流未宜棄老檣參天可乞盟
食餚羹乃無味如君高韻千載同可更托身三數公丈
夫勁挺要長久百萬叩關一夫守胸中江海不須道此
流何必計升斗眼前勃窣訴二友聽客所為公絕口

雨中作

咄咄真成夢悠悠復未知寧為牛背語不作劍頭炊雨
挾秋聲亂江含暝色悲故知無事飲猶勝頃來詩

示內

貧賤不可忘富貴安足羨我生未三十種種厭貧賤宦
情肱九折老味金百鍊稍回功名心來結香火願平生
所知人久已焚筆硯是中無真實不在儒術緣有如退
飛鷗更借逆風便病妻頗癡絕可與共開宴小女真吾
兒語學春鳥囀初非本來有且作夢中見君看手捉鼻

絕勝扇障面他年從我居同入隱士傳

寄外弟趙杓材仲

長年更多疾念爾不能忘夢去關山靜書來道里長
形骸且憔悴草木自蒼唐古縣疎還往微官絕簸揚
頗聞能吏事仍不廢文章客舍襄江下人家筑水傍
屢成千里目虛斷九迴腸我老知無用身閒欲半藏
預愁章服裏仍怯簿書忙事業煩詩卷生涯在藥囊
得非嵇叔懶寧似次公狂野檜多鱗甲寒松半雪霜
高天一鴈遠小

徑百年荒每惜朱絲斷空懷素錦張舊交渾潦倒此語
更微茫欲判五斗米先尋百本桑殘羹得共啜薄酒要
同嘗匣裏出鳴劒眼中除昧糠未容窺突奧虛自倚門

牆指點飛鴻路何人識故鄉

一本自野檜多鱗甲寒松半雪霜下云直須守歲晚

莫羨踏春陽夙受祖師印得游夫子牆直言無異理未
學故多方必若險煩感先能起仆僵君才可辨此吾說
未應亡匣裏得明鏡眼中除米糠高天一雁遠小徑百
年荒每惜朱絲斷空懷素錦張馬難逢伯樂麟有遇鉏
耨却倚摩天刃兼除治水航舊交渾潦倒此語更微茫
欲判五斗米先尋百本桑永無南浦送頻受北風涼想
弟眉宇好見兄籌策良殘羹可共啜薄酒更同嘗龜兔
初無害衰遲却未妨時尋二三子同看億千場指點征

鴻路無人
識故鄉

京師贈大有叔

尊酒相逢十載前
綠髮紅顏俱少年
尊酒相逢十載後
皮黃肉皺俱白首
叔如鴻鵠但高飛
姪似麕鼯更深走
南來行李初一逢
長安舊第冰雪中
閉門不識故人面
豪氣直欲輕元龍
平生為道不為食
少小所期皆目擊
何時相就過江南
同訪曾游舊泉石

寄蔡伯世趙才仲

我恨不識鹿門公
蔡郎心期千載同
不隨吏部曹中板
去赴長蘆寺裏鐘

一坐十月長江濱
自君之來心轉親
還書起居清源君
人間紛紛何足云

同行者誰平原孫
于我不但骨肉親
誰言不為桃花去
只愛江山亦可人

二子逃禪不計年
江湖重去水粘天
直饒透盡三關語
到底終成百漏船

木魚光裏兩蒲團意氣與我平生歡盡底告君君不會
空得癡人尋筆端

兩蒲團謂愚壁時
諸人爭收壁書

寄范子

范郎平生萬人傑只今未免兒號寒三江五湖在胸次
琨玉秋霜看筆端舊疾祇令肝肺熱春風欲開桃李顏
待約南江今夜月與渠萬里報平安

春風

春風隨長江一日行萬里蕭條起岷山歛忽度揚子江

南千酒樓春風樓上頭金樽開翠幄青帘吹客愁長堤
二月暖寒溪千古流紛紛桃李花處處作芳華不見梁
間燕空悲王謝家

聽琴

君不見龍門之下百尺桐漂飄飛雪愁寒空何年班爾
落君手小牕伴坐歌南風恍然如著山巖裏不知身在
塵埃中初聞平野飛鴻鵠歛聽金盤起珠玉遶壇古樹
鬱嵯峨六月吹霜作寒綠折楊黃華不須道別鶴離鸞

尚堪續君不見開元天子醉西都音聲十院留歡娛當時臨軒奏此曲徑須解穢煩花奴乃知恬淡世莫識無絃之趣何時無歸家愁厭箏笛耳此聲一聽還已矣會須流水訪鍾期試向爐中覓焦尾

雨後

新花欲盡竹當欄喜見空牆野色團稚子垂陰時蘭菊僕夫留水灌萋萋茶香于汝初無分酒熟逢人也強歡惱亂春光君會否小瓶猶占一枝殘

送山伯良佐東歸以務道期息塗為韻

荊棘生良心米鹽入塵務芬芳老不達豈不以此故人生
雖處囊穎未要立露玉壺近青蠅沒沒自點污剗心
萬物表却立看脫兔

臨別當一言懇懇念忠告縹囊可取足往結萬古好默
識古則然愚智同一道遠師顏氏子近比伯業操文章
有妙斲期子開窠奧

吾詩如清風去留不可期灑然或一來不繫凡子知兩

郎從我游豈但窺藩籬山房光焰在實藉衆木枝斯言
可三復如我清風詩

昔我同學生文字虎而翼仲弟最多才去以六月息自
吾失若人每語輒氣塞子如求數君慎莫怪蝨賊胸懷
但明了几案付塵黑

贈我貂襜褕報以明月珠古來聲名人一行此塗漢
中屠沽兒適可曹公奴人生嗜好異至有海上夫孰能
識其然飽此萬卷書

河水清贈良佐兼寄商老

河水清江水黃南山北山自相望恨君不止白石房與
誰同遊南郡郎白玉刻佩明月璫如鳳四海求其凰道
里遼遠日月長爽氣自足陵朝陽舉酒送君君莫忘

同晁季一李天紀過沈宗師北莊因成長韻

三年城南居不識城北土但聞玉雪郎去作猿鶴主今
晨籃輿來握手相勞苦勝遊有佳士洗耳聽妙語晴窓
背雲壑落日在環堵晚風生白楊想像原野古斷崖懸

老木小港聚寒雨却觀城市人努力自熬煮畏塗出社
席禍福有未覩杜陵懷壯游無忌笑豪舉二者覓真是
政恐君未許千秋柴桑翁妙句聊一吐

郵上祈雨

泥龍蜴蜥因追求旱徧淮南二十州寄語天公莫輕許
少留明月作中秋

清風

清風如君子所至有餘情忻然破煩溽有醉時一醒嗟

我二三友飄散秋葉零不知城南王何以識我名歌斜
左手字勞苦如平生會寫登樓賦一弔漳濱靈

學視

學視觀懸虱病耳聞鬪蟻紛然酬六鑿萬劫費揩洗君
看杯中蛇妄想從何起忽然一妙語初無強料理回觀
積年疾乃是一念使誰能明此心香山老居士

寄舍弟

殘暑墜空屋舊書穿破帷纔蒙小雨潤遽得好風吹逸

少每作惡淵明常病羸他鄉憶吾弟苦語自成詩

斷雲

斷雲西南來好風東北去翩然兩無心空中忽相遇化為一尺雪照我庭前路昔者甚可憐今來渺無處故人多勸色留我不少住羈愁動中腸疾病增百慮虛庭著明月皎皎如積素不見乘鸞子空懷舊烟霧

如臯道中

客路三日雨頗知袍袴單長河貫沃野薄酒動新寒晚

日魚鰕市秋風藜藿盤衰顏定可笑不必鏡中看

東萊詩集卷四